

## Euskararekiko motibazioa lantzeko topaketak EMUNen eskutik

EMUNEK *Moti+Batu, nagiak astinduz-mingaina askatu* izena jarri die irailaren 10ean eta 12an Donostiako San Telmo museoa inguruko diren topaketei. Lehen egunean, euskararekiko jarrera ona izan baina egiteko ohiturarik ez dutenengan nola eragin aztertuko dute. Tailerretan gai zehatzagoak landuko dituzte, hala nola: euskaraz hitz egiteko ohiturarik ez dutenei pausoa ematen laguntzeko, euren inguru hurbileko pertsonen portaerak gakoak dira; esatetik edo pentsatzetik egitera dagoen bidea aztertu nahi da. Euskaraz maite dut, euskaraz egingo dut

bihartik aurrera... baina biharko eguna iritsi eta...

Bigarren egunean, euskara ikasten ari direnei euskara erabili dezaten nola lagundu landuko dute. Era honetako hausnarketak landuko dituzte, tailerretan hauek ere: dirudenez, euskara ikasten ari denak edo hiztun berria denak hiztun gisa legitimitatea sentitzen badu, euskaraz hitz egiteko pausoa errazago emango du. Zer egin dezakegu horrela sentitu daitezen?; euskara ulertzeko arazorik ez dagoenean, bi hizkuntzak erabili ditzakegu elkarrikitara berean.



ARGIA

**Nola lortu euskara ikasten ari direnek hizkuntza erabiltzea? Horrelako galderak erantzuten saiatuko dira Donostiako topaketetan. Argazkian, Errenteriako hainbat euskara ikasle.**

## Hizkuntza aniztasunaren praktika onak Europatik Bilbora

IRAILEAN, Bilboko Alondegian, 50 aditu bilduko dira, kulturartekotasunean, aniztasunean eta integrazioan lan egiten duten eragile europarrak. Hirietan dagoen hizkuntza aniztasunak ekonomian, gizartean eta kulturaren nolako abantailak eragiten dituen aztertuko dute. European egin diren

eta egiten ari diren praktika onak kontatuko dituzte mintegian. Besteak beste, Dublin, Londres,artzelona, Berlin, Oslo eta Lisboako adibideak ezagutu ahal izango dira.

Bilboko Udalak eta Europako Kontseiluak antolatu dute mintegia, irailaren 17tik 19ra. Europako Kon-

tseiluak Cities Kulturarteko Sarea dauka eta hor biltzen dira hizkuntza aniztasunaren onurak oinarri hartuta egitasmoak lantzen dituzten hainbat hiri. Europako Kontseiluak Bilbo aukeratu du mintegia egiteko, sarean duen rol aktiboagatik eta hizkuntza arloan duen egoeragatik.

## EKONOMIAREN TALAIAN • TERMOMETROA

### Euskal Herria eraiki

BADAGO AHO BETEAN ESATEN DUENIK “Herria” eraiki behar dugula Euskal Herrian, baina ezezagun zaizkio zein urrats eman diren horretarako. Badago erakunde bat, Udalbiltza, herria eraikitzeke norabide horretan efikaziaz ari dena. Hala, Pirinioetako eskualdeak aktibatuta eta garatzeko hainbat erreminta eta egitasmo jarri ditu martxan, *Euskal Pirinioetan lan eta bizia* lelopean. Pirinioetako euskal eskualdeak, hegoaldeko zein iparraldekoak, baztertuta daude, lurralde arrazoiengatik eta egitura sozial desberdina dutelako.

Errealitate horretaz jakitun, Udalbiltzak 19 enpresa eta gizarte proiektu babestu ditu bere Garapen eta Kohesio Funtsarekin, Pirinioetako lurralde desoreka gainditzeko helburuz. Proiektu anitzak dira: barraskiloen etxaldeak, ardo ekologikoaren produktzioa edota euskarazko hedabide digitalen sorrera. 6.000 euro eman dizkio proiektu bakoitzari, eragile sozialekin elkarlana sustatu du, baita tokiko erakundeekin eta

herritarrekin ere. Azken batean, askotan emigratzera derrigortuak izan diren eskualde horietako herritarrek euren herrian lan egin eta bizitzeko aukera izan dezaten da helburua.

Testuinguru horretan, Udalbiltzaren zereginak onarpena merezi du, eta sentsibilitate politiko ezberdinez gandi, parte-hartze handiagok indartu behar da, Euskal Herriko herritarren mesederako litzateke-eta. 19 proiektu horiek eta beste batzuk aurrera ateratzeko finantzazioa behar dute. Alderdi politikoek, gobernuek, foru administrazioek eta udalek, baita finantza erakundeek ere, argi eta garbi babestu behar litzukete halako egitasmoak, herritar orok bere herrian lana aurkitu dezan, emigratzera derrigortua izan gabe. Hori da Euskal Herria eraikitzea.

Juan Mari Arregi

